



EMILIO LUÍS DÍAZ VIDAL, deputado do Grupo Provincial Socialista na Deputación de Ourense, en base ao previsto na Lei de Bases Reguladora do Réxime Local, ó artigo 91 e 97, entre outros, da Regulación de Organización, Funcionamento e Réxime Xurídico das Entidades Locais e o Regulamento desta corporación presenta unha **MOCIÓN PARA PALIAR AS PERDAS DAS EXPLOTACIÓNS GANDEIRAS SOMETIDAS A BALEIRADOS SANITARIOS**.

A mediados do pasado mes de marzo, unha granxa de vacas sita na aldea de Palleirós, no concello de Manzaneda, tivo que sacrificar todas as súas reses tras detectarse algúns casos illados de tuberculose bovina. Despois de que uns poucos exemplares da explotación deseen positivo en tuberculose, a Consellería de Medio Rural da Xunta de Galicia ditaminou o sacrificio de todo rabaño, que incluía outras 40 vacas que até entón sempre deran negativo en tuberculose nos controis sanitarios aos que foran sometidas. Malia que se solicitou a repetición das probas e que, no caso de confirmarse o bo estado de saúde do resto das vacas, estas non fosen sacrificadas, o gandeiro viuse na obriga de levar a cabo un baleirado sanitario de elevado impacto económico para a explotación. Sen tomar en consideración o impacto do lucro cesante, as perdas para o gandeiro ascenderon a uns 32.000 euros.

Entre o que se paga por animal sacrificado, o que paga o matadoiro pola carne e a axuda de 5.000 euros por trimestre por lucro cesante, os gandeiros reciben entre 1.000-1.200 euros por cabeza de gando, que non é suficiente para empezar de novo. As axudas que a Xunta de Galicia contempla non cobren o global de perdas dos gandeiros: dunha banda, non alcanzan en modo algún para a reposición dos animais sacrificados, que se atopan en idade de produción madura, aos prezos de mercado e; doutra banda, tampouco toman en consideración as cantidades que os gandeiros deixan de percibir polo dano inflixido. En conclusión, as indemnizacións non acadan o custe real que ten a reposición ou reparación dos danos polos prexuízos que ocasiona un baleirado sanitario. Esvaécense así traballo e aforros dunha vida investida nunha explotación de vacún de carne de alto rendimento

No Estado español, a lei obriga ao sacrificio dos animais que dean positivo en tuberculose, mesmo sendo estes asintomáticos. O Programa nacional de erradicación da tuberculose bovina 2023 prescribe mesmo o sacrificio dun rabaño enteiro (“baleirado sanitario do establecemento”) se media algún caso positivo, en función da prevalencia na comunidade. No caso de Galicia, onde a prevalencia é de 0, o máis mínimo positivo en tuberculose implica case que automaticamente a medida máis extrema, a saber, o baleirado sanitario dunha explotación enteira. Aínda que son mellores os datos para o vacún de leite que para o de carne en extensivo e considerando que a erradicación completa da tuberculose entóxase imposible, a situación en España e moi satisfactoria, con taxas de prevalencia moi baixas en case que todas as comunidades autónomas.

Constatando a que a situación epidemiolóxica en Galicia é óptima e que esta resulta máis que aceptábel no resto do Estado, cabe subliñar os grandes avances de hoxe en día a tomar



Grupo Provincial Socialista

Rúa Progreso, 32 – 2º andar
32003 Ourense
Tlf. 988 385 203 Tlf/Fax. 988 385 178
CIF: G32244345

en consideración en materia de diagnose. Na era da nanotecnoloxía e da xenética molecular, a proba que se leva a cabo nas vacas, que é a de intradermorreaccion preséntase coma un método case que “artesanal” e “primitivo”, que apenas evolucionou durante o último século. A realización dun exame que ten como obxectivo avaliar a resposta inmunolóxica das reses a uns alérxenos específicos, indo de explotación en explotación pinchando aos animais para, logo de tres días, regresar e avaliar o efecto da inxección, semella bastante pintoresco no terceiro milenio. Así as cousas, en virtude da baixa prevalencia, habería que avanzar cara o diagnóstica en vida dos animais da explotación afectada, evitando así os baleirados sanitarios que ameazan ser unha sentenza de morte para as granxas, que moitas veces non se recuperan e que, amais, adoitan estar situadas en zonas afectadas polo despoboamento.

Por todo o exposto o Grupo Provincial Socialista presenta as seguintes **PROPOSTAS DE ACORDO**:

PRIMEIRA.- Instar á Deputación de Ourense a demandar da Consellería de Medio Rural da Xunta de Galicia un incremento dos complementos ás axudas estatais aos gandeiros afectados polos baleirados sanitarios, que lles permitan sobrepoñerse con garantías ás perda total do seu medio de subsistencia.

SEGUNDA.- Instar á Deputación de Ourense a demandar da Consellería de Medio Rural da Xunta de Galicia a posta en marcha de mecanismos de diagnose do gando en vida, que permita sacrificar unicamente ás vacas contaxiadas de tuberculose bovina e respecte a vida daquelas que non padecen o andazo, minimizando así o impacto económico sobre as explotacións gandeiras.

En Ourense, a 12 de abril de 2024.

Asinado: Emilio Luís Díaz Vidal

SR. PRESIDENTE DA DEPUTACIÓN PROVINCIAL DE OURENSE